

金

文

最

金文最卷六目錄

制誥

立貴妃裴滿氏爲皇后制

天眷元年

立楚王爲皇太子制

大定八年

立原王爲皇太孫制

大定二十七年

道陵眞妃制

增上祖宗諡號大赦天下制

皇統五年

受尊號大赦天下制

大定七年

受加上尊號制

大定十一年

皇子生大赦天下制

皇統二年

陳王悟室加恩制

天眷二年

許道眞致仕制

擬除樞密使制

正大元年奉都堂鈐旨作

擬除司農卿制

正大元年奉都堂鈐旨作

降封遼主爲海濱王制

天會三年

降封昏德公制

天會六年

降封昏德侯制

天會六年

孔元措襲封衍聖公誥

明昌二年

超授孔元措中議大夫仍賜四品誥

明昌二年

前御史大夫張暉贈父萃卿誥

參知政事李蹊授左丞誥

鐵券文

賜國用安鐵券文

策問

試女直進士策

大定十三年  
以上原列卷十一

表

立原王爲皇太孫謝表

大定二十六年

立裴滿氏爲皇后謝表

天眷元年

章宗

悼皇后

上太祖諡號表 天會三年

完顏杲

賀俘宋主表 天會五年

完顏杲

賀俘宋主表 天會五年

宗望

上熙宗尊號表 皇統元年 見文雅

宗翰

上世宗尊號表 大定五年 見文雅

宗憲

再上世宗尊號表 大定五年

宗憲

賀宋畫河請和表 天會五年

劉彥宗

加上世宗尊號表 大定十一年

李石

加上世宗尊號第二表 大定十一年

李石

加上世宗尊號第三表 大定十一年

李石

賀追尊皇考妣禮成表 天會十三年

請受尊號禮冊表 大定六年

奉安三聖御容羣臣賀表 大定十九年

立原王爲皇太孫羣臣賀表 大定二十六年 以上原列卷十二

金文最卷六

昭文張金吾月霄輯

制誥

立貴妃裴滿氏爲皇后制

天眷元年

易基乾坤以大陰陽之統詩經夫婦乃先后妃之風故三代之令  
王謹六宮之內職況承宗廟儷辰極以居尊用正人倫揭母儀於  
無外事所繫者甚重道相須而後成非朕敢私自天作配猗與誰  
氏乃茂徽音若稽舊章誕布寵命貴妃裴滿氏慶鍾戚里教肄公  
宮夢月方娠生而固異俁天之妹卜則允臧爰用聘於先朝乃來  
嬪于初載禮肅舅姑之奉訓無師傅之違道著家人名膺邦媛逮  
予宅統率履在中承祀孔貲睦親盡孝蹈貞賢之警戒知臣下之  
勤勞纘女維行輔服不逮居軒后四星之列貴則益恭在周官六  
服之儀缺然未講宜蠲吉旦正位長秋於戲爲望甚尊有同乎天  
地流風自近以至于家邦言雖戒於闔閭令莫據于身正恩宜逮

下志務求賢非儉德不能懲奢泰之風去私謁可以贊正直之道  
慎終如始永孚於休

大金集禮

立楚王爲皇太子制

大定八年

朕恭膺景命資奉丕圖既承九廟之尊深惟固本庶係四海之望  
用永皇基斯古昔之宏規亦邦家之先務天與上嗣慶自中宮紹  
中國之建儲稽禮經而立嫡肆遵彝典式示寰區皇子楚王某資  
賦聰明才兼文武剛健而循理端厚而寡言從師友則進學敏修  
道古今則經耳成誦造庭匪懈見孝敬於問安養志無違表忠勤  
於視膳至于疏封大國益盡小心操履謙和姿儀肅謹蓋神明之  
胄稟異而天地之祐茲宏是宜叶繼照於明離觀主鬯於沔震上  
以纂祖宗創業之緒下以慰臣民引領之誠其以某爲皇太子仍  
令有司擇日備禮冊命主者施行布告中外咸使聞知

大金集禮

立原王爲皇太孫制

大定二十七年

朕膺上天之眷命紹列祖之宏基惟懷永圖早定元嗣上以承休

于累祖下以係望於多方嗟繼體之云亡賴貽謀之有託蓋天下大器可不正其本歟而世嫡皇孫所謂無以易者矧其賢德之著宜貳宸極之尊肆舉彝章式孚有眾皇孫開府儀同三司尚書右丞相原王某祥開甲觀秀出天支夙挺溫文日隆孝敬性資超異自幼已若于成人學問明敏所得必臻于至理昨進封于王社俾作牧于神州政成于旬月之間美審乎輿人之誦爰立作相歷試諸難並彰時序之能大副師言之錫顧垂統必資於善繼而奉鬯不可以久虛是用正名茲惟合禮今立某爲皇太孫所有合行典禮宜令有司條奏以聞布告中外咸使聞知

大金集禮

### 道陵眞妃制

古有六寢式奉宸闈天垂四星蓋臨北極朕祗承先帝敬建掖妃載頒優異之恩以對柔嘉之則休符佐相早立邃庭左右圖史之規進退珎璜之節彤管有煒象服是宜用光四德之書仍侈六珈之飾嗚呼攀軒龍而莫及望絕鼎湖悵蒼梧之莫返魂銷澧水惟

德徽之益遠宜命數之倍敦尙深送往之誠愈保安貞之吉

隆水

增上祖宗諡號大赦天下制

皇統五年

朕聞大一統以居尊必推功於祖考交三靈而儲佑當均慶於臣民國家敕命惟時重光莫麗純德符于軒昊大功軼於禹湯肆朕纂承敢忘駿惠而廟諡所紀德美未詳凜夙夜之靡甯集臣鄰而博議謂祖有功而宗有德雖已祇率于舊章若敬所尊而愛所親尙克繼成于先志肆涓良日肇舉上儀神靈居歆中外胥悅宜廣配天之澤永昭凝命之休可大赦天下內外大小職官並與覃恩於戲嗣恭德于前人其無遏佚得歡心于四海庶格燕甯更賴三事宗工百司庶正益懋贊襄之意弼成繼述之功

大金集禮

受尊號大赦天下制

大定七年

朕以菲德獲承至尊賴祖宗燕翼之謀啟國家興復之運以至邊鄙撤警民人奠居永思積累于咸平何敢康甯于夙夜鴻名顯冊



實所未遑懇請交章誠難固拒乃涓穀旦昭受上儀既揚對天之  
休宜厚錫民之福可大赦天下內外大小職官並與覃恩

大金集禮

受加上尊號制

大定十一年

朕以祖業維艱天下至大圖維負荷莫敢荒甯賴九廟貽謀三靈  
協贊仁征義伐時靡有爭長治久安慮無遺策諸福之物畢至萬  
邦之年屢豐邇者干羽敷文郊宮肆祀禮樂明備神祇燕甯是皆  
多助之致然豈獨眇躬之能爾而羣工在列徽號見加懇請既堅  
再辭不獲載余俯從于眾欲亦將上合于天心肆膺備物之儀用  
答樂推之望今已勉受應天興祚欽文廣武仁德聖孝之號嗚呼  
政成則歸美效當通上下之情有大而能謙敢自忽盈成之守布  
告遠近咸使聞知

大金集禮

皇子生大赦天下制

皇統二年

禮重世嫡爲其承七廟之尊國有元良所以繫萬邦之望顧惟菲

德獲紹丕基勤以恤民居軫夙宵之念約於奉已敢親聲色之娛  
豈惟中外之共知抑亦神明之所鑒荷三靈之錫羨祐累聖之重  
光慶集中宮時生上嗣宗社奉鬯已肇應於震方雷雨發春宜均  
敷於解澤嘉與億兆同茲懼忭可大赦天下云云於戲辰象著明  
於赫前星之耀恩書寬大助宣冲氣之和更賴三事大夫百司庶  
府其欽承於德意期式敘于民彝永沐淳風翕臻神域

大金集禮

陳王悟室加恩制

天眷二年

貴貴尊賢式重儀型之望親親尙齒亦優宗族之恩朕俯迫羣情  
祇膺顯號爰第景風之賞孰居台曜之先凡爾在廷聽予作命具  
官屬爲諸父身相兩朝蹈五常九德之規爲四輔三公之冠當艱  
難創業之際藉左右宅師之勤如獻兆之信誓龜如濟川之待舟  
楫迪我高后格于皇天屬正統之有歸賴嘉謀之先定緝熙百度  
董正六官雍容以折肘腋之姦指顧以定朔南之地德業並茂古  
今罕倫迨茲慶賜之頒詢及僉諧之論謂上公之加命有九而天

下之達尊者三既已兼全無可損益乃敷求于載籍仍自斷於朕心杖以造朝前已加於異數坐而論道今復舉於舊章蕭相國賜詔不名安平王肩輿升殿併茲優渥以獎耆英於戲建無窮之基則必享無窮之福錫非常之禮所以報非常之功欽承體貌之隆其對邦家之祉

松漠紀聞

許道真致仕制

安車蒲輪天子所以厚優賢之禮黃冠野服人臣所以遂歸老之心其恩榮足以兩全而前後不可多得有臣如此如卿幾人具官道直以方氣剛而大議論非世儒所到名節以古人自期擢自先朝置之諫列斥安昌竊位已聞折檻之忠及梁冀伏辜方見埋輪之志朕初卽大位稔聞直聲起之于田里退閑之閒超之于侍從論思之地完備始終之節從容進退之閒歎陽城之敢言惜其將去念孔戣之旣老挽之莫留特進一階榮躋四秩華山拂袖最是爲世上之閒神武挂冠猶不負山中之相勉終晚節益介壽祺

溢

擬除樞密使制

正大元年奉都堂鈞旨作

在天垂象璣衡通紫極之嚴稽古象賢宥密極洪樞之峻故非智  
辯無窮則不足以語成敗安危之要非威望素重則不足以馭梟  
俊強悍之臣敷求天下之奇才以屬國家之大計誕告于眾余得  
其人具官某沈鷟有謀矜嚴不撓達用兵之善志厲許國之精忠  
戎陣有年膚公屢奏出奇應變森然武庫之雄厭難折衝隱若長  
城之固屬機庭之虛職容羣牧以擇賢才氣無雙士皆樂屬李廣  
策慮幅億時則有若陳湯是用假以本兵之權置諸右府之長於  
戲漢有汲長孺邪謀寢于淮南唐相李文饒威令行於河朔蓋屈  
人貴乎不戰而銷患在於無形予將以中興而責成爾其以上策  
而自任尚恢遠略無及近功

遺山集

擬除司農卿制

正大元年奉都堂鈞旨作

田政維天下之大綱古有播百穀之命農臣分戶曹之外務今爲

治六府之官況假以部使者之權位于中執法之次自非智數足以豐財賦風采足以動縉紳則何以察吏治之不臧究貨源之通塞疇若子采僉曰汝諧具官某志大而氣剛智明而才邵遇事不滯砉然新發之鋒挺身而前凜乎後彫之節自預時髦之選浸階華貴之游蔚爲名臣簡在朕聽是用進以稽臣之貳委茲邦計之繁朕惟西北用兵以來朝廷多事之際斂散之術旣廢罪功之辨不明官必仰給于創罷之民民或重困于侵漁之吏蓋基本急于愛養而綱紀貴乎設張朕方以一道之事而責成爾得以三載之功而自効於戲生之有道則財恆足率之以正則令必行劉晏之輕重相權算不忘于馬上范滂之澄清自任志已見于車中罔俾斯人專美于世

遺山集

降封遼主爲海濱王制

天會三年

敕可大遼皇帝延禧定矣廢興之數孰謂任天迹其榮辱之來無非象德從古已降其事皆然以爾長惡謂之不君積釁至于亡國

比讒逆諫侮聖矜能烝淫見亂于人倫驕佚不移于本性銅山屬  
弄臣之輩金穴藏外戚之家對之終日無話言行之常代惟亂政  
淫刑以逞視妻子如豺狼典禮不修輕人臣如犬馬旋聞中外大  
紊紀綱朋邪與忠正無分優倡其后妃雜處室如懸磬猶能峻宇  
雕牆人之流離不輟從禽逐獸邦之机隍民曰怨咨方當降罰之  
時更稔怒鄰之意蕩搖我邊鄙招納我叛亡爰自先朝以修武事  
我師直而順動彼勢屈以自摧曾于奔走之間輒有和成之請卽  
爲恩義許結兄弟更張美矣之辭矯示友于之字孽旣自作禍從  
此深骨肉見俘宗廟失守疇昔大勢已謝往銜去國之悲于今後  
事何爲莫有逃天之計自知窮蹙方以歸投然嘉來意之甚勤其  
柰罪條之具在旣爲天之廢棄又爲民所仇讐加之斧鉞則豈謂  
無名投諸魍魎則誰云不忍事難與恕朕固合爲載念取亂覆昏  
屬兵武有成之舉繼絕興廢是國家非常之恩免降新封止除舊  
號可封爲海濱王其供帳安置並如典例嗚呼朕循故事無專己

以妄爲爾有前非宜撫躬而內省祇服厥命以保乃身故茲詔示  
想宜知悉

大金弔伐錄

降封昏德公制

天會六年

制詔佖曰王者有國當親仁而善鄰神明在天可忘惠而背義以  
爾頃爲宋主請好先皇始通海上之盟求復山前之壤因嘉懇切  
曾示允俞雖未夾擊以助成終以一言而賜予星霜未變釁隙已  
生恃邪佞以腹心納叛亡爲牙爪招平山之逆黨害我大臣違先  
帝之誓言愆諸歲幣更邀回其戶口惟巧尙于詭辭禍從此開孽  
因自作神人以之激怒天地以之不容獨斷旣行諸道並進往馳  
戎旅收萬里以無遺直抵京畿豈一城之可守旋聞巢穴俱致崩  
分大勢旣以云亡舉族因而見獲悲銜去國計莫逃天雖云忍致  
其刑章無奈已盈于罪貫更欲與赦其如理何載念與其底怒以  
加誅或傷至化曷若好生之惡殺別示優恩乃降新封用遵舊制  
可封爲昏德公其供給安置並如典禮嗚呼事益稽于往古曾不

妄爲過惟在于爾躬切宜循省祇服朕命可保諸身

大金弔伐錄

降封昏德侯制

天會六年

制詔桓曰視頽綱以弗張繼何以舉偏覆轍而靡改載或爾輸惟乃父之不君忘我朝之大造嚮因傳位必冀改圖且無悔禍之心翻稔欺天之惡作爲多罪矜恃姦謀背城下之戴恩不割三鎮搆軍前之二使潛發尺書自孽難逃我伐再舉兵士奮威而南指將臣激怒以前驅壁壘俱摧郡縣繼下視井惟存乎茅經濟河無假于葦航豈不知口徒嬰城中果爲我獲出詣軍前尋敕帥臣使趨朝陛罪誠無赦當與正於刑名德貴有容特優加于恩禮用循故事俯降新封可封爲昏德侯其供給安置並如典禮嗚呼積釁自於汝躬其誰可恕降罰本乎天性豈朕妄爲宜省前非敬服厥命

大金弔伐錄

孔元措襲封衍聖公誥

明昌二年

聖謨之大儀範百王德祚所傳垂光千祀葢立道以經世宜承家



之有人文宣王五十一代孫孔元措秀阜衍祥清洙流潤芝蘭異  
稟蔚爲宗黨之英詩禮舊聞蚤服父兄之訓語年雖妙論德已成  
肆疏世爵之封仍煥章身之數非獨增華于爾族固將振耀于斯  
文勉嗣前修用光新命

祖庭廣記

超授孔元措中議大夫仍賜四品誥

明昌二年

夫子旣沒千八百年後人相承五十一世自近古已公其爵顧散  
階如彼其卑必也正名難于仍舊是以興百王之曠典峻五品之  
華資茲以爾有成人之風繼將聖之後當余定格會爾疏封噫廟  
貌存焉克謹歲時之祀家聲久矣無忘詩禮之傳學有餘師善將  
終譽

祖庭廣記

前御史大夫張暉贈父萃卿誥

昔石建有醇德而一家萬石袁氏著仁心而四世五公古有其人  
今乃親見某以德行爲世檢以文學登世科孫則尙書子惟御史  
門閭之懿近代罕聞推其從來自爾素積生而冠萬人之高選沒

而膺一品之追崇其有知乎亦足榮矣

溢水集

參知政事李蹊授左丞誥

君不借才於異代所資者當世之英豪天將降任于是人必付以大賢之事業朕以寡昧獲紹基圖念祖宗開創之艱思社稷久長之計而四郊多壘羣生未甯提封未入於版圖陵寢尙霑於霜露中夜以歎茲心靡皇期得英偉絕俗之才以濟險阻非常之運疇若予采今得其人具位李蹊器識邁倫才猷經世以文雅飾吏事以術業贊廟謀比長外臺辭宣之政事已試召還中省張鎬之籌策甚良是用貳我機衡進之丞轄嗚呼承平之世中庸談笑而有餘多難之時賢哲馳驚而不足身濟大業力恢中原幸得遭時其任以天下之重毋以有己或負于人主之知勉盡乃心以稱朕意可改授尙書左丞兼修國史加上柱國餘如故

溢水集

鐵券文

賜國用安鐵券文

皇帝若曰咨爾內族英烈戡難保節忠臣儀同三司都元帥兼平章政事究王完顏用安大邦惟屏古有格言王府策勳賞存舊典卿台階孕秀海岳儲靈天賦忠貞性資明敏初爲兒戲營壘已成長學神機風雲暗曉方將提挈義旅勤勞王家服金革以不辭冒矢石而有勇頃遭逢於多壘偶陷沒于他邦而能臨事見機去僞從正變疾風雨謀先鬼神一舉而患難殄殲不時而州縣皆復聽聞如此歎矚久之朕方總攬英雄興建功業體天地含宏之德厚君臣始終之恩昨爾以諸王之封寵爾以上公之位氏族已書于玉牒勲業復紀于太常蓋欲有及于十世閒嫌恩積於一門泰山黃河永及爾裔皇天后土實聞斯言肆申白馬之盟庸示丹書之約嗚呼謂予不信鑒詩人皦日之辭弗與同心如文公白水之誓尙奉非常之渥以承無疆之休

王堂嘉話

策問

試女直進士策

大定十三年

賢生于世世資于賢世未嘗不生賢賢未嘗不輔世蓋世非無賢  
惟用與否若伊尹之佐成湯傳說之輔高宗呂望之遇文王皆起  
耕築漁釣之閒而其功業卓然後世不能企及者蓋殷周之君能  
用其人盡其才也本朝以神武定天下聖上以文德綏海內文武  
並用言小善而必從事小便而不棄蓋取人之道盡矣而尙憂賢  
能遺于草澤者今欲盡得天下之賢而用之又俾賢者各盡其能  
以何道而臻此乎

金史  
以上原列卷十一

表

立原王爲皇太孫謝表

大定二十六年

章宗

端門宣詔方渙鴻恩宸御臨軒載昭茂典祗膺寵數倍積兢慚伏  
以豫建儲闡號稱國本仰以守宗祧之祀俯以系天下之心匪有  
元良疇諧師錫伏念臣年方冲弱性本庸虛猥承世嫡之名優渥  
聖恩之託始從羣爵改昨國封特起自於服廬使習知於政務暫  
涖京畿之任旋升端揆之司嘗竊省修已多忝越乃復嗣位承華

之重正名貳極之崇瑤牒寶章奉徽儀而增惕龍樓難載撫蕞質以奚勝茲蓋云云爲宗社無疆之計惟古今大義之公既享貴貴之風仍厚親親之愛憶中宮於已往悼主鬯之方虛念臣乃昭德之遺孫憐臣實宣孝之嫡子遂曲垂於茲眷俾得冒於殊榮臣敢不恆自恪勤益深勛勵惟師善事惟邇正人學禮讀書慕聖賢之篤行問安視膳率忠孝之良規

大金集禮

立裴滿氏爲皇后謝表

天眷元年

悼平皇后

龍袞珠旒端臨雲陛玉書金璽榮昇椒房恭受以還凌兢罔措恭惟道兼天覆明並日升誠意正心基周王之風化制禮作樂煥堯帝之文章俯矜奉事之勞飭遣光華之使溫言獎飾美號重仍顧拜命之甚優慙省躬而莫稱謹當恪遵睿訓益勵肅心庶幾婦道之修仰助人文之化

松漠紀聞

上太祖諡號表

天會三年

完顏杲

功與天同者非天不可以儷號德與地合者非地不足以齊稱昔

在三皇以同天之功而爲喻降及五帝以合地之德而建名故功德克配於乾坤則稱號久光於竹帛仰惟先大聖皇帝撫興隆之運膺眷命之休奉天討以除殘運神謀而制勝曾不十載底定四方代虐以寬拯遼民於焚溺交鄰有道得宋國之服從豈非百代之閔休抑亦羣生之幸會方期定鼎遽泣遺弓皇帝陛下以同氣之親隆奉先之孝誕布聖武訖成代功茲垂烈於無期實肇基之有自敢上強名之號願新追冊之儀日月之光雖不容於繪畫海嶽之施庶以報於涓埃

大金集禮

賀俘宋主表

天會五年

完顏杲

伏觀破汴俘獲宋主者豈生鄰國宜我伐之用張佑自皇天果罪人之斯得照臨之下忭舞攸同竊以天棄宋邦運終趙氏爲鄰數載取怒兩朝信則背先帝之恩遽淪海上之約桓則負吾皇之義又違城下之盟惟父子之罪同條故神人之心共棄旣爲吾愾詎訖厥誅王旅嘽嘽往專求於首惡虎臣矯矯思亟奏於膚功羽檄

旁飛神旗南指郡縣既下城壁俱摧前軍徑濟於黃河王氣潛消  
於赤縣堅甲利兵固資義勝高城深壘其如德何自知天網以難  
逃俱詣軍門而請罪望闕虔籲天之請在郊展銜璧之儀願上版  
圖乞爲臣屬獲諸殷紂武王自誓於商郊繼彼秦嬰高祖親營於  
灞上未如聖代專委帥臣去年獲遼國之君遙聞捷報今日俘汴  
都之主佇聽降音不出戶庭克平海宇此蓋皇帝陛下神謀獨運  
廟算無遺甫逾載稔之間繼有非常之事告成先廟振不墜之英  
風傳報諸侯聳無疆之德勢六合之內罔不服千古以來未之有  
如臣等叨備宰司獲承聖略媿無裨贊徒幸遭逢元會在辰式集  
四方之賀愚誠歸美敢揚萬壽之休

大金弔伐錄

賀俘宋主表

天會五年

宗翰望

臣等奉詔伐宋屢克城邑繼至汴京閏月二十五日克汴三十日  
宋主趙桓出城今月二日率其諸王百官國人僧道望闕稽首跪  
上降表者稔惡弗悛自難逃於天網得道多助孰敢抗於王師惟

宋永八世之承平恃百年之儲積內有甲兵之備外無邊境之虞  
以其隔大海之遙未嘗通先朝之間太祖大聖皇帝誕膺歷數肇  
造邦家被邦乃密修浮海之勤懇致復燕之請輒憑一介遂割兩  
京曾未立於歲時已遽忘於恩造動搖我封部招納我叛亡皇帝  
陛下以生靈爲心擴乾坤之量但令理辨曲示含容迄無意於改  
圖方以師而問罪信則倉皇而遜位桓惟哀泣以求存議割三府  
之疆請復兩朝之好豈意我師甫退信誓又渝茲益重於前愆累  
再煩於天討蓋憑成算以底全功遂令繼世之君俱爲亡國之虜  
威靈遐暘文軌大同臣等出分閭外之憂坐獲師中之吉躬齊五  
伐不勞仗鉞於商郊仰祝萬年願效捧觴於漢殿

大金弔伐錄

再上世宗尊號表

大定五年

宗憲

函章屢貢宸聽未回雖聖心能以自傲在臣下有所未安夫簡在  
上帝之心謂之應天紹復先王之業謂之興祚仁以守位德以撫  
民無所不通非聖孰能與此先之以愛夫孝何以加乎道備至明



名非虛美臣等不勝大願謹固加上尊號曰應天興祚仁德聖孝  
至明皇帝

大金集禮

賀宋畫河請和表

天會五年

劉彥宗

我伐用張果獲師中之吉罪人斯得旋爲道左之降凡預見聞孰  
不呼慶竊惟有宋昔謂殊鄰始馳一介而來請講兩朝之好推誠  
以待背德不恭乃父陰結於平山旣渝海上之約厥子不割我三  
鎮又愆城下之盟迨惡貫之旣盈蹈覆車而不戒聖算先定天兵  
載揚以蟻蟲蚊蚋之屯戰猛虎熊羆之士且天助者順人助者信  
旣弗履行雖城非不高池非不深詎能固守彼眾狼狽而失據我  
軍奮躍以登陴夷門之火始然汴河之水皆沸臣主無捐軀之所  
社稷有累卵之危問使絡繹之求哀諸侯涕淚而拜叩申致畫河  
之請敢逃削地之誅且能修臣子之極恭惟所命令是用存朝廷  
之大體不卽滅亡已昭討叛之形又著服柔之義金鼓一動威德  
兩全此蓋皇帝陛下旋乾轉坤開日闢月逍遙游息而廣土以定

拱揖指顧而大事聿成巍巍我功高冠百王之上煌煌國步獨尊  
六合之間臣叨處鼎司出提兵柄逢千年之會徒其快於斯時奉  
萬年之觴恨阻陪於列辟

大金弔伐錄

加上世宗尊號表

大定十一年

李石

帝王之典莫大乎承天臣子之心不忘於歸美蓋至德答乾坤之  
貺宜貴名增日月之光伏惟云丕釐耿命廣闢皇圖寅畏嚴恭簡  
帝心而上應高明光大繩祖武以勃興守位曰仁爲政以德聖心  
通物之微隱孝治廣民之儀刑迄用康年惟時懋敬憲唐虞之稽  
古監夏殷以從周由用天休肇稱郊祀祖廟社稷罔不肅祇羣神  
山川於茲望秩斷自緝熙之學敷爲經緯之章至若江淮來同海  
隅肆靖西旅之陪臣跋扈詔始問而卽誅朔幽之羣醜逋逃兵一  
臨而得雋暴禁亂止眾和民安四方無虞諸福畢至功德若茲民  
臣何報惟有對揚於鉅典庶幾推謝於鴻恩臣等以爲禮無不敬  
之謂欽經緯天地之謂文所覆者大之謂廣保大定功之謂武臣

等不勝至願謹加上尊號曰應天興祚欽文廣武仁德聖孝皇帝  
大金集禮

加上世宗尊號第二表

大定十一年

李石

天因人而進順人即天亦弗違名者實之賓有實則名其可已茲  
者羣情之歸美以其偉節之無前抑而未從悚然失措夫正心而  
誠意修己以安人至於出入起居罔不嚴恭寅畏謹四時而致孝  
享敬五事而承天心此欽之實也仁義立廉恥張禮樂明法度著  
建中和而爲皇極求儒雅而闡大猷以來遠人以洽四國此文之  
實也富有之謂大業德容以受丕基恢然如乾道之包涵博哉如  
乾元之持載無此疆與爾界皆一視而同仁此廣之實也授神略  
以折遐衝稽長道而屈羣醜陟威懷之禹跡小綬定之唐功七德  
頌乎止戈一戎昭乎除亂此武之實也實旣如此名宜謂何伏望  
聖慈從人之願  
大金集禮

加上世宗尊號第三表

大定十一年

李石

南郊迎至以報天惟國家之熙事聖人備道而全美屬臣子之揚  
休從古已然故實且在伏望少忘冲挹俯賜矜從高拱穆清不受  
典冊答神祇之靈貺協臣庶之歡心

大金集禮

賀追尊皇考妣禮成表

天會十三年

聖子神孫膺期邁駿烈考文母正名垂鴻爲帝者之大榮宜臣哉  
之胥慶伏惟睿蘊生知愛敦終慕駒馳過隙嗟日月之不我留龍  
飛在天視富貴之無以樂欲報之德不忘於心故能尊其所尊可  
謂孝乎惟孝爰遵舊典仰奉徽稱亦旣追王宜載隆於異數本爲  
繼祖非謂顧其私親葬循周武以肆遷事比漢宣而更異駿奔清  
廟贊大禮以告成驚集冊庭對宏休而歸美

大金集禮

請受尊號禮冊表

大定六年

頃奉制書誕揚徽號未崇冊典實鬱輿情今已四方無虞百工允  
治節令調而五穀稔盜賊息而兆民安咸謂天下適當斯旦伏願  
俯從忠悃昭受丕儀

大金集禮

奉安三聖御容羣臣賀表

大定十九年

三后在天神遊雖邈一人忠孝廟寢是崇既新寶冊之成載肅眞儀之奉涓辰遷宇浹宇均歡賀中祇通先猷緝熙茂集言念武元之成烈蓋遵聖肅之貽謀太宗守以文睿考嗣其德慨瞻遺像增大原祠聳層觀之巍巍規模具麗仰睟容之穆穆精爽如存臣陪侍親祠獲觀緼禮孝悌之至遂能通諸神明祖考以安於是成其福祿大金集禮

立原王爲皇太孫羣臣賀表

大定二十六年

璿宮敷佑夙開甲觀之祥寶冊正名爰定春宮之位云云載舉升儲之典式昭繼體之光肆嚴奉於宗祧保永安於社稷是謂立國家之本有以格神祇之歡少海分流接瀛波而增潤前星續耀拱帝座以常明和氣周被於九區厚福延及於羣品臣等欣逢聖運幸覩曠儀基緒有輝仰重離之協吉戩穀來備慶萬壽之無疆大金

集禮

以上原列卷十二

金文最卷六

金文最卷七目錄

表

謝帶笏表

見文雅

王寂

上章宗尊號表

趙秉文

上章宗皇帝實錄表

趙秉文

禘禮慶成表

趙秉文

賀立皇太子表

趙秉文

統軍謝免罪表

趙秉文

平章謝撫諭表

趙秉文

車駕幸慶甯宮皇妃起居表

趙秉文

車駕幸慶甯宮皇妃起居表

趙秉文

百官起居表

趙秉文

賀閏月表

趙秉文

樞密左丞授平章政事表

趙秉文

平章授左副元帥謝表

趙秉文

賜宣慰夫人葬賻贈龍腦水銀錦段謝表

趙秉文

平章左副元帥謝宣諭賜馬鉸具兔鶻匹緞藥物表

趙秉文

謝宣諭生擒賊將田俊邁表

趙秉文

謝宣諭破壽蔡州賊賜玉靶劔玉荷蓮盞一隻金一百兩內

趙秉文

府緞一十疋表

見文雅

丞相謝過表

趙秉文

平章乞致仕表

趙秉文

左參政乞致仕表

見文雅

趙秉文

宰相為蝗生乞罪表

趙秉文

擬賀登寶位表

正大元年奉都堂鈞旨作

元好問

擬御史大夫讓樞密使表

正大元年奉都堂鈞旨作

元好問



遼主降表

遼主謝免罪表

遼主謝封海濱王表

宋主降表

宋主降表

係令改定

晉德公謝賜婚內族表

天會七年

晉德公謝賜幣帛酒果及許諸女相見表

晉德公奏赴鶻里改路安置表

重晉侯謝賜幣帛酒果及許諸女相見表

宋國誓表

皇統二年

夏國誓表

天會二年

夏國賀正表

高麗稱臣表

天會四年

高麗謝宣諭表

恭孝王

恭孝王

高麗賀平宋表 天會五年

恭孝王

高麗誓表 天會七年

恭孝王

高麗謝還送金鐵衣崔頗喜及馬匹表 天會七年

恭孝王

高麗請免追索保州投入人口表 天會八年

恭孝王

高麗賀正表

高麗請以弟晔權守軍國表 大定十一年

莊孝王

高麗奏權守軍國表 大定十一年

光孝王

高麗請以弟暉權守軍國表 承安三年

光孝王

高麗奏權守軍國表 承安三年

靖孝王

高麗奏權守軍國表 崇慶十年

元孝王

渤海賀正表

降表

郭藥師

封曹王謝表 以上原列卷十四

劉豫

金文最卷七

昭文張金吾月霄輯

表

上章宗尊號表

趙秉文

率籲眾願祇薦鴻名奉綸命以未俞慮精誠之未至輒申前懇仰  
瀆宸嚴伏冀矜從以期得請臣聞乾坤之量無得而形容日月之  
光不勞於繪畫其有功參化育理謝名言應帝王之迹蓋出強名  
殫臣子之誠又烏可已欽惟皇帝陛下天資英粹聖學緝熙宣列  
聖之重光席太平之休運文物煥乎三代聲教浹乎八荒爰自卽  
位以來專以愛民爲務置常平以備水旱遣信使以勸農桑三讞  
之外而尙慮囚徒萬機之餘則親覽章奏減樂府出宮女定律令  
正禮儀闢儒館以崇文繪功臣而厲武恢土德以大中原之統繚  
塞垣以杜外夷之虞所爲經略萬方彌綸百度大功非止於數十  
聖德未究其毫釐是以德澤之流霧靄雲蒸瑞應之至山湧水出

神鳳翔於磁郡寶鼎出於汾陰年穀屢登邊鄙不聳時雨赴感瑞雪應期天人之際已交上下之望咸塞由是勲戚庶政文武具僚緇素之流耆艾之屬其願薦鴻稱者以億計而久曠大典者踰十年尙虞庶政之闕遺復慮榮名之侈及夫稽政道不若察眾望守謙德不若建大中況此皇王之上儀祖宗之故事闕上儀而不舉皇上將有愧於前遵定制之已行祖宗亦有望於後使典禮而未備豈臣鄰之敢安若夫淵懿冠倫宥密基命發育萬物裁成兩閒所以繼於天儲思穆清游以昭曠宵爾神略巍乎帝功所以法於道澤昭天泉恩及麋卵博施濟眾視民如傷茲不曰仁乎雲漢天章金玉王度藻飾萬物轆轤三光茲不曰文乎賞不閒於賤疎罰不阿於貴近其理財也取之有制其御戎也動而有經茲不曰義乎不怒而威不殺而服天戈所指則凶渠授首皇威所震則夷齊請臣茲不曰武乎窮理盡性無方可測謂之神極深研幾無所不通謂之聖至明以照乎萬里之外大孝以甯乎七廟之神臣謹上

稽天心下察眾志謹與文武百僚懃懃懇懇不勝大願固請上尊  
號云云伏望陛下曲回淵聽俯察輿情爰及陽春昭受顯號命禮  
官而諏日詔儒者以刺經參二帝以爲三襲六經而爲七編金刻  
玉坐膺備物之儀拊石鳴鐘大講中天之禮四方來賀萬壽無疆  
臣無任云云

遂水集

### 上章宗皇帝實錄表

趙秉文

臣秉文等言伏以唐虞之際有典謨茂彰洪烈文武之政在方策  
迄爲顯王自昔人君必存史籍既有其豐隆顯懿之德亦賴夫溫  
醇深潤之文鋪張對天之洪休揚厲光前之偉蹟然後事辭不苟  
聲實相當伏以章宗皇帝聖敬日躋聰明時乂光膺大業祇述先  
猷稟大有爲之資千古挺出行不忍人之政基年有成發廩粟以  
賑貧窮置外臺以審刑獄罷征斂於卽日減租稅者累年敦勸農  
桑裁定制虔孝承祖廟款謁天壇秩曠古之無文定國朝之大禮  
生徒徧學校冠蓋環橋門煥乎之文足以藻飾百度赫然之怒足

以震疊萬方始以殷高之明鬼方肆伐終然宣后之烈淮夷來舒故得孽宋增幣以乞盟阻鞮革心而效順西服銀夏東撫辰韓歲時相望琛寶入貢由是蒸爲瑞氣散爲祥風神鳳來翔寶鼎出現野蠶成繭嘉穀旅生至於奎璧之文河洛之畫日月出矣光其不亦難乎江漢濯之隔乎不可尙已尙卻徽稱而不受愈彰聖德之難名二十年閒鼓舞太和之治億萬世後光華惇史之書況夫良將之遠籌賢相之婉畫所表忠臣節婦所舉異行茂才本兵興賦之煩生齒版圖之數所宜具載以示方來欽惟皇帝陛下夤紹燕謀思光前烈謂信書之未畢恐遺美之不昭深詔儒臣詳爲寶錄往在東海之際已抽中秘之書踵此編年俾之載筆屬典策之未上值敵寇之不虞師旅繹騷篇帙散逸欽承聖訓復命編摩徧閱官牒曲加搜訪然而起居注有所未備行止錄有所未詳或摭摭於案牘之餘或採拾於見聞之際載之行事誠咸五以登三及此成書懼挂一而漏萬臣等所編成章宗皇帝實錄一百卷并事目

二十卷總計一百二十卷繕寫了畢謹具進呈狀伏望聖慈曲垂省覽臣文章矇昧學術空疎遺美不彰雖乏三長之妙直辭無愧庶伸一得之愚

溢水集

禘禮慶成表

趙秉文

親祀祖廟有嚴禋獻之儀上順天陽益定尊卑之義禮行一日風動四方欽惟御眾以寬奉先思孝吉蠲近日款謁大宮戒嚴之際則風雨順從將事之夜則月星明朗祖考昭假福祿來宜惟熙事之備成實太平之高致臣預瞻隆禮祇侍齋祠神其格思昭一人之有慶君曰卜爾酢萬壽之無疆

溢水集

賀立皇太子表

趙秉文

繼體承祧尤重元良之寄立嫡以長式符公器之歸華夏宅心天人同慶欽惟茂隆聖德誕受丕基深維永圖早定大本重明麗正繼照則蓋取諸離一索得男主器者故受之震上以隆廟社無疆之福下以係臣民咸戴之恩羽翼已成豈藉商山之皓謳歌攸屬

益知子啟之賢臣等久沐天恩預聞國慶雞鳴問寢賡歌三善之  
休虎拜颺言仰祝萬年之壽

溢水集

統軍謝免罪表

趙秉文

誤軍期者無赦邦有常刑忘人罪而責成君之大德已捐前眚仍  
玷新恩中謝臣聞王者使臣功不如過人臣報國死不如生要之  
能至於成功可以麤償於宿負一昨臣分屯西道俾扞北陲羸置  
營屯稍增塹壘皆本授之成算固無取於瑣才朝廷察臣小心寄  
臣大任委之以精兵之地授之以專對之權庶知敵情預爲邊備  
而臣才微責重識暗慮輕誘未識於楚羸敵妄言於邾小遂闕儲  
胥之備尙遺宵旰之憂大則置之典刑小則削其仕籍國曰可殺  
臣猶自知豈意隆恩曲全微命枯骨復肉寄面何顏尙且慮臣以  
輕敵損威憫臣以積憂致斃謂臣智雖失料心則無他盡棄前瑕  
許圖後效激昂有地奮躍呼天此蓋伏遇皇帝陛下燭物以明及  
人以德忘曹沫三敗之辱要孟明一戰之功遂致罪囚復塵任使



臣敢不洗心知悔畢志改圖再三經畫之籌庶裨帷幄萬一生成之賜少答乾坤不勝激切之至

溢水集

平章謝撫諭表

趙秉文

外虞肆靖方深重慎之懷中使俯臨俄示撫存之渥人微任重寵與愧并如臣者素乏壯猷濫膺閭寄才雖無取心則靡皇欽惟皇帝陛下內恕及人至明燭物憫河南之積暑知臣下之微勞臣敢不益勵懦衷仰酬睿澤王事靡盬敢懷蒸淥之憂天威所臨卽遂凱還之樂

溢水集

車駕幸慶甯宮皇妃起居表

趙秉文

八月其穫適當講事之秋三歲乃巡尤見重民之意動惟時順樂與時同欽惟深略偉文睿謀經遠修己以安百姓正家而御萬邦王業所基必本關雎之化朝廷旣治乃講騶虞之田妾等留侍掖廷阻趨行闕女工載績望虞舜之裳衣聖壽無疆期周王之福祿

溢水集

車駕幸慶甯宮皇妃起居表

趙秉文

正時以閏方欣萬寶之成出狩於田猶俟三農之隙豫順以動益  
悅無疆欽惟皇帝陛下乾坤其仁金玉其慶駕言出狩車旣攻而  
馬旣同無已太康民不勞而國不費屬秋霜之戒候與聖體以御  
宜妾等留侍中閨阻朝外闕羽旄有美想聞百姓之歡弓韉興祥  
更上多男之祝

溢水集

百官起居表

趙秉文

民狎於野方農務之告成時邁其邦象天威而講武翠華所駐和  
氣交形欽惟駿惠先猷動遵古制俎豆舉三驅之禮羽旄形百姓  
之歡豈徒獲赤雁以作歌薦之郊廟庶幾得飛熊而應卜福夫邦  
家臣等祇奉綸言叨釐省務廣汾水秋風之作阻預羣官頌南山  
天保之詩願言萬壽

溢水集

賀閏月表

趙秉文

五年再閏雖云王者之居門一歲三田皆於農隙以講事禮昭大

統歡溢綿區欽惟適奢儉之中參文武之用交物有則視民如傷  
世已治而戒事之無虞歲已登而慮民之不給猶謹治兵之教載  
爲省斂之行飲是太和錫之純嘏臣等祇膺綸命留玷中臺卽雲  
氣以望蓬萊一心徒切祝泰元之授神筴萬壽無疆

澄水集

樞密左丞授平章政事表

趙秉文

陳力不能方虞罪責捫心何有遽及寵光聞命若驚以榮爲懼  
謝臣伏聞典冊所載謂天官不可假人祖宗以來示宰相不皆用  
舊或以內親於百姓而外撫於四夷有非其人不付以事如臣者  
斗筭小器櫟櫟散材偶塵科第之微遂忝縉紳之列亦嘗參中書  
之政叨左轄之司徒累明恩無補國論天實鑒此臣猶知之偶邊  
隅少警之初乃臣子効節之日當先行列況忝丞疑左右樞省者  
四年來往東西之兩地賴神謀之經略底外裔之服降敢叨天功  
以私臣力伏惟陛下憫臣以簪履之舊矜人以犬馬之勞謂雖無  
術以補天或可因人而成事綸言下逮中使俯臨官超四階爵躋

一品人微寵厚祿重身輕欲上章引避則慮瀆聽聞欲奉命馳驅則實懷慚懼臣之進退交集兢惶意明聖之遠圖以羈縻之新附欲壓以重臣之勢敢懷乎小已之私敢不益勵初心誓圖後効天威不遠實懷過厚之誠聖德難酬仰祝無疆之壽

趙秉文集

平章授左副元帥謝表

趙秉文

歌六月飭戎車利執言於醜虜作三軍謀元帥誤置貳於庸虛聞命若驚撫心知愧中謝臣聞兵應者勝豈得已而後興師出無名彼不亡而何待過勞聖慮臨遣將臣如臣者朴以少文懦而不武雖幸平鼠竊之寇而愧匪鷹揚之材奉命以來以榮爲懼然士氣已吞於吳會而天誅未卽於淮夷敢意兵符重忝閭寄此蓋伏遇皇帝陛下功超將將道顯威威任事而必以誠與人而不求備授之成算折此遐衝遂致非才亦叨重責仍且頒金而佐費錫藥以扶衰臣敢不佩賜孔懷味珍知戒享士廣分甘之惠勞師體止渴之仁是以似之敢後西平之子不遑甯止尙寬南顧之憂

趙秉文集

賜宣慰夫人葬贈龍腦水銀錦段謝表

趙秉文

伏以義不顧私既鑿凶門而出恩猶逮室更迂卹典之華死況於  
生感深以泣中謝伏以君父之託受脈啟行伉儷之恩從宜可貶  
方深國慮何以家爲臣素乏將才叨承閭寄寵踰其分釁鍾厥家  
仰累明恩俾光私室錫龍水以爲葬斂之具飾錦綺以爲賻贈之  
資數極哀榮恩深窀穸此蓋伏遇皇帝陛下冠冕至德體貌羣臣  
施恩於既往之魂垂德於不報之所遂令朽骨亦沾餘榮兒姪至  
於誓心犬馬猶知懷惠歿而有識應結草以知歸生者可知至蓋  
棺而後已一心莫展萬壽無疆溢水集

平章左副元帥謝宣諭賜馬鉸具兔鶻匹緞藥物表

趙秉文

小醜亂常致干天討偏師壓境屢奏膚功豈料庸疎猥承褒寵中謝  
伏以薄伐荆楚鋪敦淮瀆來旬來宣增六軍之氣不留不處成  
三務之功以至提虎旅之三千破島夷之數萬孤城擒布異域獲

嘉敢叨天功以爲臣力此蓋伏遇皇帝陛下仁心惻怛詔旨溫直  
癡老爲之聳觀武夫至於感泣人百其勇士一乃心縱其前禽執  
此醜虜捷無虛日賞不踰時撫戰士之勤勞優將臣之寵錫遂令  
眷渥曲被微躬佩刀非斷割之才解帶乏羈縻之術徒復驅馳聖  
策衣被天光奉命靡皇味珍知愧臣敢不據鞍忘老執轡請行載  
惟筐篚之恩莫非臣民尙謹藥石之戒恐累主知不矜小捷之易  
成庶獲大功而圖報

淫水集

謝宣諭生擒賊將田俊邁表

趙秉文

凶渠生致頓收一戰之功中使俯臨過沐九重之諭寵光曲被感  
愧交并中謝臣聞周王歌六月之師殷高美三年之克豈有偏將  
成師而出醜虜望風而奔捷以至三一皆當百雖未馘孫權之首  
已能俘孟獲之降從古罕聞於今爲烈此皆一人授算諸將協心  
謀不遺長臣於何有欽惟皇帝陛下沈幾獨運羣策兼收慮小器  
之易盈戒成功之難保臣敢不銘心聖訓畢至事機草木知威已

振先聲之氣蜂蠆有毒更深慮勝之懷

滄水集

丞相謝過表

趙秉文

怪神不語諒天道之匪謔信偽難明亦人言之可察咎將誰執臣

猶自知

中謝

伏以申觀儲祥甘泉錫慶茲爲社稷之大計豈朦臣

子之至情而臣等易動浮言輒爲膚奏庶幾崑崙之賤或叶唐兒  
之微豈謂以憑虛之言冀無妄之福罪之大者天可欺乎欽惟陛  
下開日月之明廓乾坤之德謂臣過在輕信察臣心則匪他赦其  
智識之不明復以訓辭而諄諭臣敢不洗心加厲捫舌知非報國  
無功但抑譸張之患事君有義益堅畏慎之誠

滄水集

平章乞致仕表

趙秉文

恩厚身輕莫有涓埃之報效力微任重豈逃天地之鑒臨恐貽覆

餗之差輒有避賢之請

中謝

臣聞忠臣不敢受無功之賞明君不

能畜無用之臣然後朝議俞諧天工無曠如臣者斗筭小器樗櫟  
散材早際休明偶塵任使適邊隅之少警備行列以居前仰賴聖

慈苟逃罪責既委之要衝而獨當一面復預於帥闕而總統諸軍屬聖主之嗣圖尙賊臣之稽戮但知除君側之惡不敢避天威之誅豈意罪不汝瑕寵踰所望猥進貳樞之重與聞政事之煩內無張華經國之謀外無營平破賊之計在承平之日不敢冒居況多難之時豈能有補加以門膺世爵子尙主姻在君恩更何以加而臣才僅止於此豈微軀之敢愛慮賢路之久妨伏望皇帝陛下廓日月之明回雨露之施別求俊異俾就退閒使臣無居寵之嫌得安常分而國有得賢之助早致太平

滄水集

宰相爲蝗生乞罪表

趙秉文

陰陽佐理濫居丞弼之司蝗旱爲災深負變調之責兢惶失措蹶蹈靡安伏念臣等以斗筭之材膺棟梁之任外不能鎮四夷而撫百姓內不能調元氣而率羣臣徒累明恩叨承重寄以致旱暵爲虐貽當亡之憂螟蟥繼生爲下民之害歲一不熟罪將安歸方聖主建中興之功而臣等蹈素餐之責位苟冒處人其謂何伏願皇



帝陛下憫臣以無功而自慚察臣以有罪而自劾別求俊異許就退閑庶可下弭謗言上消沴氣則知天工之不曠亦足爲榮但令賢路以無妨猶云有補

潘水集

擬賀登寶位表

正大元年奉都堂鈞旨作

元好問

中國之有至仁無思不服聖人之得大寶咸與維新凡在照臨舉深慶抃中謝竊以社稷隆神器之重父子處人倫之先付與既公眾庶斯定我國家光宅天下丕冒海隅世祚承平古無倫擬先皇帝總持權柄宏濟艱難安強成道德之威信順得天人之助大功甫集明命有歸欽惟皇帝陛下孝弟通於神明忠厚及於草木聖神文武克享皇天之心獄訟謳歌皆曰吾君之子百年享國初得正傳三后在天更無遺恨大定明昌之治增重宜及於此時周宣夏后之功專美豈容於他日風雲嘉會日月中興臣等夙被生成重叨際會接千歲之統既欣歷數之有歸上萬年之觴行慶版圖之盡復

遺山集

擬御史大夫讓樞密使表

正大元年奉都堂鈐旨作

元好問

憲府備員積有妨賢之畏樞庭謀帥遽膺制勝之求拊陋質以何堪對寵光而知懼中謝臣聞受祿過量忠臣恥其素餐因能任官明主不以私授蓋物勝於權則衡爲之殆馬竭其力則御速於顛臣雖至愚敢忘斯義伏念臣智靈弗競器蘊尤疎初無落落過人之才徒有區區自信之志薦更中外無補事功竊憂大譴之方來敢謂異恩之橫被而況樞極通帝位之紀宥府嚴師律之謀周設六官司馬聯於冢宰漢分三府太尉列於中台故必文武智能之臣乃付腹心爪牙之任人歌宣后豈無吉甫之憲邦天啟高皇宜得留侯而籌幄顧以菲才而叨據在於公議而謂何伏望皇帝陛下大道曲全至明博照察臣心之有愧憫臣力之弗勝追還誤恩妙簡良輔退而勞力足昭名器之至公因是得人旋致朝廷之增

重

遺山集

以上原列卷十三

遼主降表

臣耶律延禧言今月十八日西南西北兩路都統府差蕭愈等賫到文字該准奉詔旨招諭者伏念臣祖宗開先順天人而建業子孫傳嗣預功德以守成家有大遼權持正統拓土周數萬里享國餘二百年從古以來未之或有迨臣纂紹卽以云爲恃太平旣久之時隙累代常行之法寢行侮易先忤交和輒無名以行兵望有捷而張勢曲直旣顯勝負自分雖黷武之再三曾敗績之非一往馳信使永講前歡特蒙天地之恩許結弟兄之睦臣更爲眩惑弗克遵依以是再引戈矛重尋釁隙民神共怒智力俱窮寶命旣歸神器難守宗廟傾覆甘承去國之羞骨肉見俘獨作逃生之虜非天時之未識緣已罪之尤深宣諭幸聞宸恩得浹臣自知咎惡猶積兢惶伏念皇帝陛下念上世之舊歡恕愚臣之前過許奉先人之祀留爲亡國之餘則百姓蒙再造之恩一族感聚居之義謹與見在從官望闕俟罪

金吾案北盟會編引亡遼遺錄載  
天祥降表與此迥異附錄於後

遼國降臣耶律延禧謹伏斧鉞躬詣大金國俯伏待罪臣聞人不  
患其勇患其爲暴也伏念臣祖宗創二百年之基承天統位繼子  
傳孫郊祀上帝內外懽慶豈意微臣骨寒命薄無德可裒不能當  
此夙夜惶駭罔知過咎冒犯忌諱若曉霜而遇烈日扁舟而遭怒  
濤罪惡競興譖辭蜂起致茲慚德激揚聖怒轉加兵師憂驚之極  
如坐炭湯蓋聞枳道之放荷蒙記恤況若新安之歎例受無辜念  
漢皇之仁恩誕敷霈澤誚項羽之過惡奚免終傷臣所懇者乞諧  
枳道之留免效新安之禍戰慄之至仰干聰聽昧死謹言

遼主謝免罪表

臣延禧言四月八日賁到詔書一道特免臣罪及撫諭仍與西南  
西北兩路都統勃極烈同朝見者豈不自知合被罪盈之責將何  
以報特蒙望外之恩欣幸越常兢惶失次伏惟皇帝陛下仁洽萬  
物道配二儀猶推不忍之心靡追既往之咎溫頒天語秩振德音

俾底安全特寬罪戾非一身甚幸免武湯問罪之威抑舉族矜全  
荷唐虞好生之德今專俟都統孳極赴闕同行次

大金弔伐錄

遼主謝封海濱王表

臣延禧言今月七日伏蒙聖慈特賜詔書一道降封臣爲海濱王  
者罪當不免誠天下之公言恩及有加見聖人之全度事來望外  
喜見憂中伏念臣粵自祖宗肇有社稷山河固國開數萬里之提  
封功德浹民享二百年之福祿迨臣繼統之後昧於守成之難矜  
得太平作爲多罪先絕鄰好輒造釁端遂出無名之師果爲有德  
者勝未更十載併失五都左右以之離心中外以之解體漸及窘  
迫旋至播遷命寶以歸神器安在朝夕莫保骨肉見離伶俚一身  
淒苦萬狀昔兵連怨結幾年忤先帝之心今勢盡力窮何能逃吾  
君之手伏承皇帝陛下具依遺旨明諭聖言許臣不死之恩恕臣  
既往之咎故當道聽是卽歸懷今則先廟告成中宸賜見凌兢失  
魄慚汗何顏卽加斧鉞之誅正爲當罪如投魍魅之處非不甘心

豈期遽易刑章曲從禮典所幸得全性命敢希天上之恩何期不  
伍公侯更賜日中之號此蓋皇帝陛下大明徧照至德兼容取亂  
侮亡仗殷周之義繼絕興滅推唐虞之仁以致此身得承先祖倘  
九廟之靈不昧潛亦知恩況百口之屬更生何忘報德

大金弔伐

### 宋主降表

臣桓言伏以今月二十五日大兵登城出郊謝罪者長驅萬里遠  
勤問罪之師全庇一宗仰戴隆寬之德感深念咎俯極危衷臣誠  
惶誠懼頓首頓首猥以眇躬奉承大統惜不更事濟以學非昧於  
知人動成過舉重煩元帥來攻陋邦三里之城已失藩籬之守九  
廟之祀當成煨燼之餘不圖深仁曲假殘息茲蓋伏遇伯大金皇  
帝乾坤之德甚博日月之照無私不怒之威既追踪於湯武好生  
之德且儷美於唐虞弗念一夫之辜特全萬人之命宇宙載肅宗  
社獲安文軌既同永託保存之惠雲天在望徒深嚮往之誠無任

瞻天望聖激切屏營之至奉表稱謝以聞臣桓誠惶誠懼頓首頓首謹言天會四年十二月 日

大金弔伐錄

宋主降表

係令改定

臣桓言背恩致討遠煩汗馬之勞請命求哀敢廢牽羊之禮仰祈蠲貸俯切凌兢臣桓誠惶誠懼頓首頓首竊以契丹爲鄰爰構百年之好大金闢國更圖萬世之歡航使旌絕海嶠之遙求故地割燕雲之境太祖大聖皇帝特垂大造許復舊疆未閱歲時已渝信誓方獲版圖於析木遽連陰賊於平山結構大臣邀回戶口雖違恩義尙貸罪愆但追索其人民猶夸大其土地致煩帥府遠抵都畿上皇引咎以播遷微臣因時而授禪懼孤城之失守割三府以求和屢致哀鳴亟蒙矜許官軍纔退信誓又渝密諭土人堅守不下分遣兵將救援爲名復構結於使人見包藏之異意遂勞再伐並興問罪之師又議畫河實作疑兵之計果難逃於英察卒自取於交攻尙復嬰城豈非拒命怒極將士齊登三里之城禍延祖宗

將隳七廟之祀已蠲銜璧之舉更叨受館之恩自知獲罪之深敢有求生之理伏惟皇帝陛下誕膺駿命紹履鴻圖不殺之仁既追蹤於湯武好生之德終儷美於唐虞所望惠顧大聖肇造之恩庶以保全弊宋不絕之緒雖死無辜受賜亦多道里且修莫致顓天之請精誠所格徒深就日之思謹與叔燕王偁越王偁弟鄆王楷景王杞祁王模莘王植徐王棣沂王櫟和王栻及宰相百僚舉國士民僧道耆壽軍人奉表出郊望闕待罪以聞臣誠惶誠懼頓首頓首謹言天會四年十二月 日大宋皇帝臣趙桓上表 大金弔伐錄

昏德公謝賜婚內族表

天會七年

臣佶伏奉宣命召臣女六人賜內族爲婦具表稱謝伏蒙聖恩賜敕書獎諭者仰勤睿眷曲念孤蹤察流寓之可憐俾宗藩之可託伏念臣棲遲一己黽勉四遷顧齒髮以俱衰指川途而正邈獲居內地罔聞流言得攀若木之枝少慰桑榆之景此蓋伏遇皇帝陛



下擴二儀之量乎羣有之私因獨夫所守於倫安辨眾情免涉於  
疑似臣敢不誓堅晚節力報深恩儻伏臘稍至於蕭條賴葭莩必  
濟乎窘乏尙祈鴻造俯鑒丹衷臣無任瞻天望聖激切屏營之至  
大金弔伐錄

昏德公謝賜幣帛酒果及許諸女相見表

天恩下逮已失秋風之寒父子相歡頓覺春光之煖遽沐絲綸之  
厚仍蒙縑繹之頒感涕何言驚惶無地竊以臣舉家萬指流寓三  
年每憂餬口之難忽有聯親之喜方虞季子之敝誰憐范叔之寒  
既冒寵榮愈加驚悸此蓋皇帝陛下唐仁及物舜孝臨人故此冥  
頑曲蒙保衛天階咫尺無緣一望於清光短艇飄飄自此面瞻於  
魏闕

大金弔伐錄

昏德公奏赴鵲里改路安置表

臣佶言伏蒙宣命差官館伴臣赴鵲里改路安置於今月二日到  
彼居住者曲照煩言止從近徙仍敦姻好尙賜深憐大造難酬撫

躬知幸竊念臣舉家萬指流寓連年自惟譴咎之深當務省躬之效神明可質詎敢及於匪圖天地無私遂得安於愚分驚濤千里顛躓百端幸復保於桑榆僅免葬於魚鱉此蓋伏遇皇帝陛下垂邱山之厚德擴日月之大明非風波而可移亦浸潤而不受回瞻象闕拜沃澤以馳心仰戴龍光感孤情而出涕

大金弔伐錄

重昏侯謝賜幣帛酒果及許諸女相見表

暫留內殿忽奉王言特許手足之相歡更被縑綈之厚賜喜驚交至恩旨非常伏念臣稟性冥頑賦資忠實負邱山之罪天意曲全聯瓜葛之親聖恩隆大方念無衣之卒歲遽欣挾纊之如春此蓋伏遇皇帝陛下內恕及人勞謙損己雖天地有無私之覆載而父母有至誠之愛憐念報德之何時懷此心而未已

大金弔伐錄

宋國誓表

皇統二年

臣構言今來畫疆合以淮水中流爲界西有唐鄧州割屬上國自鄧州西四十里并南四十里爲界屬鄧州其四十里外並西南盡

屬光化軍爲敝邑沿邊州城旣蒙恩造許備藩方世世子孫謹守  
臣節每年皇帝生辰并元旦遣使稱賀不絕歲貢銀絹二十五萬  
兩匹自壬戌年爲首每春季差人般送至泗州交納自來流移在  
南之人經官陳說願自歸者更不禁止上國之於敝邑亦乞並用  
此約有渝此盟明神是殛墜命亡氏踣其國家臣今旣進誓表伏  
望上國早降誓詔庶使敝邑永有憑焉

金史宗弼傳參字文虛中

### 夏國誓表

天會二年

臣乾順言今月十五日西南西北兩路都統遣左諫議大夫王介  
儒等齎牒奉宣若夏國追悔前非捕送遼主立盟上表仍依遼國  
之制及賜誓詔將來或有不虞交相救援者臣與遼國世通姻契  
名係藩臣輒爲援以啟端會犯威而結讐旣速違天之咎果罹敗  
績之憂蒙降德音以寬前罪仍賜土地用廣藩籬載惟含垢之恩  
常切戴天之望自今以後凡於歲時朝賀貢進表章使人往復等

事一切永依臣事遼國舊例其契丹昏主今不在臣境至如奔竄  
到此不復存泊當卽執獻若大朝知其所在以兵追捕無敢爲地  
及依前援助其或徵兵卽當依應至如殊方異域朝覲天關合經  
當國道路亦不阻節以上所敘數事臣誓固此誠傳嗣不絕苟或  
有渝天地鑒察神明殛之禍及子孫不克享國

金史

### 夏國賀正表

斗柄建寅當帝座更新之日葭灰飛管屬皇圖正始之辰四序推  
先一人履慶恭惟化流中外德被邇遐方熙律之載揚應令候而  
布惠克凝神於突奧務行政於要荒四表無虞羣黎至治爰鳳閣  
屆春之早協龍廷展賀之初百辟稱觴用盡輸誠之意萬邦薦祉  
克堅獻歲之心臣無任云云大使武功郎沒細好德副使宣德郎  
季膺等齋表詣闕以聞

松漠紀聞

### 高麗稱臣表

天會四年

恭孝王

大人垂統震耀四方異國入朝梯航萬里況接境之伊邇諒馳誠

之特勤伏惟天縱英明日新德業渙號一發羣黎無不悅隨威聲所加鄰敵莫能枝梧寶帝王之高致宜天地之冥扶伏念臣瘠土小邦藐躬涼德聞非常之功烈久已極於傾虔惟不腆之苞苴所以伸於忠信雖愧蘋蘩之薦切期山藪之藏

高麗史

高麗謝宣諭表

恭孝王

高伯淑至密傳聖旨保州城池許屬高麗更不收復竊以句麗本地主彼遼山平壤舊墟限於鴨綠累經遷變逮我祖宗值北國之兼并侵三韓之分野雖講鄰好未歸故疆及乎天命維新聖王旣作見兵師之起義致城堡之無人當臣父先王時有大遼邊臣沙乙何來傳皇帝敕旨曰保州本高麗地高麗收之可也先王於是理其城池實以民戶當此之時雖小邦未嘗臣屬上國而先帝特欲寵綏鄰藩霑以訓辭賜之舊土及後嗣之繼序適聖德之承天備認德音恭修臣職惟此東濱之寸土本爲下國之邊陲雖嘗見奪於契丹謂已拜恩於先代特推異渥乃屬弊封豈僥倖而致茲

蓋遭遇之異甚深仁大義不可名言綿力薄材若爲報效惟當備  
春秋之事守藝極之常舉邦國而樂輸傳子孫而永誓高明在上  
惻惻無他

高麗史

高麗賀平宋表

天會五年

恭孝王

非常勝事不世異恩實千古之未聞舉一方而祇服皇帝陛下應  
三靈之符讖襲累世之宗祧仁之所漸者深則義之所制者眾德  
之所施者廣則威之所屈者多故得神兵一揮率土大定東西南  
北拓地增疆華夏蠻夷望風束手功業光輝於竹素威靈聳動於  
乾坤今者飭使節以有宣與侯邦而同慶便蕃上眷渥縟多儀惠  
厚及遐固論酬而無計心存事大但忠盡以爲期

高麗史

高麗誓表

天會七年

恭孝王

使節賁來訓詞密諭俯僂聞命凌兢矢圖竊以周官司盟掌其盟  
約之法盟邦國之不協與萬民之犯命者而詛其不信而已至於  
衰季春秋之時列國交相猜疑不能必於誠信而惟盟誓之爲先

故詩人譏其屢盟而夫子與其胥命伏惟皇帝陛下至德高於帝  
堯大信孚於天下光開一統奄有四方大邦震其威小邦懷其惠  
惟是小邑介在邊隅聞真人之作興先諸城而朝賀故得免防風  
之罪辱儀父之褒略諸細故待以殊禮錫之以邊鄙之地諭之以  
貢輸之式朝廷更無與於他故屬國敢有於異心而嚴命薦至敢  
不祇承謹當誓以君臣之義世傳藩屏之職忠信之心有如皦日  
苟或渝變神其殛之

高麗史

高麗謝還送金鐵衣崔頗喜及馬匹表

天會七年

恭孝王

聖德方增大畏小懷而咸造龍光普被薄物細故而不遺臣聞費  
誓稱馬牛其風臣妾播逃勿敢越逐祇復之此雖諸侯之事然其  
言有諧於墳典其教不戾於帝王故編之乎聖人之書而次之於  
天子之命軌法萬世稱爲六經伏遇皇帝陛下神明勃興威德兼  
備通達之屬莫不服從夷夏之民皆爲臣妾矧惟下邑附近東隅

處國奉藩早盡畏天之禮推恩字小已蒙割地之仁況承皇使之移文更覺宸慈之浹物在邊境之未事尙不遺忘見朝廷之至仁務爲寬厚顧惟孤寡何以勝堪瞻言咫尺之威第識拜命惟是春秋之事庶無後倫

高麗史

高麗請免追索保州投入人口表

天會八年

恭孝王

聞命以還精爽震越草芥之鵷輒復剖陳神聖之慈冀賜矜察退惟踰僭愈切兢惶伏念臣蕞然薄材職是小國值真人之受命興大業以統天卽慕義以入朝遂稱藩而修貢皇帝陛下仁深解網德厚包荒諒其面內之勤推之事小之會天會四年丙午九月日遣宣諭使高伯淑來傳詔旨亦有口宣保州城更不收復其投來人口亦令小國取便臣當時跼蹐下階拜受明命嘉與臣民權忻感戴區區之心已兼表謝又天會六年戊申十二月日報諭使司古德韓昉來傳別錄保州之地初有詔諭更不收復意謂必能祇率舊章遵奉王室故朝廷不受其地特行頒賜爾後數歲尙未進



納誓表於理豈爲穩便及自來脅從并逃移戶口其數頗多皆稱  
物故殆未可亮又昨來敕旨許賜保州並無一城境內語句兼未  
畫定界至自是見得係內地分宜約束封吏右上數事爾國果能  
推誠享上卽納誓表皎然自明朝廷亦當回賜誓詔兼別降指揮  
申畫封疆一切務從寬大成長久之計又韓昉移文館人曰朝廷  
方以大信示天下肯欺爾國臣受書言之明白感德意之殊尤指  
天誓心拜獻章表竊意宸慈俯賜誓詔而璽書薦至訓飭加嚴彷徨  
憂懼不知所圖況念人物投來之事是臣父先王未獲臣事上  
國時薄物細故而責之若此非乖小國慶賴之心亦恐非朝廷以  
至仁大德寵綏下藩之意此臣所以披肝瀝血干冒天威不能自  
止者也伏望皇帝陛下俯回明照深賜哀憐法先王綏遠之經用  
大漢釋逃之制特允至誠之請曲推全度之恩雖小陋以無能必  
激昂而論報葵藿之意向白日以長傾江漢之流朝滄海而不息  
皇天后土鑒臣此言

高麗史

高麗賀正表

帝出乎震方當遂三陽之生王次於春所以大一統之始覆幬之內懽慶皆均恭惟中孚應天大有得位所過者化闔眾甫以常新不怒而威觀庶邦之率服茂對佳辰之復備膺諸福之休臣幸邁昌期遠居外服上千萬歲壽曾莫預於臚傳同億兆人心但竊深於善祝云云使朝散大夫衛尉少卿輕車都尉賜紫金袋李仲衍奉表稱賀以聞

松漢紀聞

高麗請以弟昭權守軍國表

大定十一年

莊孝王

臣今久纏疾恙漸致衰羸神靈以之皆荒氣力以之消沮醫攻熨而莫效藥瞑眩而不瘳豎居膏肓天奪魂魄以之祇服前人之訓言率先列國之貢藝而乃民政堆案而或廢於剖決國賓踵門而或失於將迎爲邦之道旣墮事主之儀多闕今則伏在牀枕幾委支體仰繫覆露之私深念播苗之業臣昔逮事臣父先國王嘗屬臣云苟有遞代必先弟及今臣有元子滋少而無慧長且多愆未

堪主營以展勤矧復奉藩而受職竊見弟皓忠順之德夙勤於君親恭睦之心無懈於朝夕載嘉淑行之如始益體理命之有徵乃於某月某日以臣弟臣皓權守軍國事務敢茲上聞冀照下懇高麗史

高麗奏權守軍國表

大定十一年

光孝王

覆幬之仁靡私於一物聖神之德均視於萬邦恪布忱辭冒干洪造伏見臣兄國王臣覲久尊周室樂藩緣感疾於中身遂抱羸於積稔十全不能措其手一丸豈復效其靈沈綿深頓仆是懼頃因脫釋於重負始欲保守於餘年蓋由承稟臣先國王臣楷遺屬以臣忝爲同母之親可付先祔之業於某月某日令臣權守軍國事務而臣避之無計受亦誠難將籲呼以上聞顧跋涉之愈遠又黎庶不可以無主保釐不可以闕人勉副羣情假司分寄戰兢之抱莫敢遑甯危慄之懷幾致隕越敢具事實以達宸嚴高麗史

高麗請以弟暉權守軍國表

承安三年

光孝王

鶴鳴於九皋尚有可聞之響葵傾於日豈無委照之私敢憚懇款之誠仰瀆高明之鑒伏念某猥將緜力叨襲藩封表東海之濱久陶於聲教迫西山之日忽染於病疴一腳偏枯而行必借於人扶兩眼並昏而視不過於步內自年齡馴致若此非藥餌所可能爲且當國政之堆前意必迷於去取如或皇華之臨境禮必缺於將迎念茲雖謂之小邦厥位難虛於一日顧父言之在耳須弟及而傳家故臣曩曾受付託於臣兄今宜畀重艱於臣弟況臣兄有元子臣某嘗傳聞於遺訓亦承順於臣心固謂太叔之賢非所跂及願附延陵之節固欲退藏而臣母弟暉德服人心名高戚里非特能保父於下國亦可藩宣於上朝乃於九月二十三日以弟暉權守軍國事務敢布腹心之微用祈覆載之惠

高麗史

高麗奏權守軍國表

承安三年

靖孝王

覆物無私帝王之至德仗信以事臣子之良規敢吐忱辭冒干聰

聽伏念舊邦遺裔荒服會臣遭逢解網之時涵泳垂衣之化伏見  
臣兄國王臣皓逮事先帝至於聖朝述職僅三十年禮無所失享  
壽餘六十載病莫能興藥乏萬金之哀病同二豎之苦欲釋重務  
庶保殘齡追述臣父國王楷遺囑以九月二十三日令臣權守軍  
國事務而臣迫此懇辭避將何計願負託之大重將呼籲以上聞  
然念宗廟不可以乏嗣黎元不可以無主勉從誠請假守繁機若  
臨淵而履冰或至隕越倘回霜而收電永荷生成區區之誠實天  
所鑒

高麗史

高麗奏權守軍國表

崇慶十年

元孝王

伏見國王譔早傳先業恪守外藩忽嬰疾病以彌留浸致形骸之  
甚弱攻療無狀顛仆是憂庶因脫釋於繁機姑欲保全於餘喘蓋  
由承稟臣仲父先國王臣暉遺囑以臣親則猶子理合承家如有  
遞更必先推與乃於前年十二月二十五日令臣權國事務而臣  
褻辭不獲已受亦難堪願付畀之非輕將籲呼而遙達然念黎元

不可一日而無主祊社不可曠時而乏嗣勉副羣情假司重器跼天踳地實深隕越之懷剖心折肝仰告端倪之實倘回淵聽深荷鴻恩

高麗史

### 渤海賀正表

三陽應律載肇於歲華萬歲稱觴欣逢於元會恭惟受天之祐如日之升布治惟新順夏時而謹始卜年方永邁周厯以垂休臣幸際明昌良深忭頌遠馳信幣用伸祝聖之誠仰冀清躬茂集履端之慶

松漠紀聞

### 降表

郭藥師

天會四年正月相時而動動止固未之有常順天者存存亡甯可以以不察事屬已定人難執迷伏惟皇帝陛下祇奉先猷紹隆正統皇天所以假手而誅亂生民所以延頸而俟蘇臣等素提一旅之師旋屬百六之運自秦首之指伐洎文后之擅權政教皆失其紀綱恩威不行於咫尺十家欲叛者八九一日將死者再三在亡遼

無可事之君顧大金有難歸之路故率萬兵而附漢然嘗三載以撫燕宋主載嘉秦官是復祇念感一殮之惠尙思殞七尺之軀故窮捍禦之勞庶圖報答之效戰卒旣寡餘力何施矧知上帝之是依敢思困獸之猶鬪豈一身之是惜念百姓之無辜頃者東徂雖曾雷震之敢犯今焉北去尙期天地之有容臣等謹以全燕文武官事將校并馬步甲兵十萬及係官斛粟錢帛諸物等謹陳表上進以聞

大金弔伐錄

### 封曹王謝表

劉豫

禮成大冊澤霈普天特列晉其封階不遐遺於舊物望闕拜命闔門感恩臣豫誠懼誠忤頓首頓首伏念臣昔仕季朝粗厯要官昧方枘圓鑿之理竭徙薪曲突之忠項氏將亡一范增而不用周家旣勝致箕子之來歸試有微能爰升大位辭不獲已報將若何承積年殘毀有餘凡百事艱難已極闢寇賊以置朝市披荆棘而勸耕桑應機投隙以傾挫敵鋒損己便人以招集散徙忘寢忘食必

躬必親培廣業以惟勤庶大恩之不玷俄知廢罷之議愈堅措畫  
之心要先時成務於斯邦覬後日受知於上國至聞混一之意不  
待再三之言卽隨使人往受宣命素所祇備復何遲疑百年辛苦  
以經營兩手懽忭而分付帝號若釋重負王爵尤感鴻恩自得清  
閑而北來未嘗徘徊而南望久安僻地忽被改封泊奉讀於訓詞  
若躬聽於御語溫其如玉煖然自春星斗輝輝麗窈然之天道典  
謨渾渾顯大哉之王言徽軫爨下之焦桐青黃溝中之斷木光生  
懸罄之室榮長設羅之門茲蓋伏遇皇帝陛下德奉三無澤均九  
有敬識百辟之享獨觀萬化之原有功而必見知無罪而常善赦  
遂令窮悴得與褒嘉臣敢不守靖致虛安時處順何以效涓埃之  
報惟不爲名器之差

北盟會編參大金弔伐錄  
以上原列卷十四